

# 1 TESALONAIKA

## Iraba Reoro Vo Vukuo Iava

Pol vo pasio rigatoreva tavete tapi touoro vo Korin urui-ia 50 yia Jisas vo kavauaro isivaaro iava. Taraiparoepa voeao-ia Jiu-pa irara oea vuria rutu oisoa purapaive lotupa irara-ia oirao pie vovou irara. Eva-a oa iava vo rigato purapareva voea varaaro oirao pie vovouro goru piepasa. Uva aue iava tapo rigatoreva Krai vo vorearo iava vore vo rasio oirao pie vovou irara ou piesa vuvuiua iare (1 Te 4:13–5:11).

1. Pol vearo vaisi purareva Pautoa-ia voeapa Tesalonaika vata, 1:1-10.
2. Pol vo kovoaro iava vao oa purareva Tesalonaika-ia, 2:1–3:13.
3. Oirao pie vovou irara uvui iraopaai ra airerei vovouvira toupaive, 4:1-12.
4. Turaro oirao pie vovou irara rutu ousa vorevira voreroverea, 4:13–5:11.
5. Ovoioa reoro Pol varaaro, 5:12-28.

**1** <sup>1</sup>Ragai-a vao-ia Pol ragoa vo pasio rigatoavoi vaierevo tapo toupaoro Sailas vaio ora Timoti. Origatoa oa puraavoi visii rutupa lotupa irara visiigoa evoa Tesalonaika-ia toupataveira, visii eva Pauto Aite voeaaro ora Turaro Jisas Krai. Uva variripaiei visiipa oisore ra visiipa tauva vatesi ora gavaurea.

## Voeao Tesalonaika-pa Irara Oisoa Oirao Piepaive Rutu Torevokovira Rutu Toupaoro

<sup>2-3</sup>Igoa peva vao igoa vokiara rutu-ia Pautoa-ia vearo vaisi purapaioveira visii iavirava. Uva visii vaisipaioveira variriara-ia, vo rara visii vo pitupituarore rugoopaio, vo osa visii varaaro-ia oirao pie vovouro oavisii goruvira kovopataveira, ora vo osa oearovupa siraopaoro voea tauvapataveira. Ora vao-ia tapo visii vaaro rari vovou rutu, vo osa vigei reraarore Turaro Jisas Krai tuepaoro eisi goruvira raripataveira vo Pauto Aite oavi osireiara-ia. <sup>4</sup>Oiraopavira rutu araoko irara oaio visii kavikopareveira rutu Pauto. Uva visii-ia oisi taraipaiei oiso, Visii eva visiigoa roporeva Pauto ora rerapa, oisore ra oiso rutu toupata rera voeaaro.

<sup>5a</sup> Vao iava uvare Vearo Siposipo iava siposipoava visiipa. Ari ita, viapau oiso reo turituri raga oa siposipoavora visiipa. Viapau. Ari gorua rutu tapo-a Tugoropato Uraurato iavirava. Uvare ragai vo rearo-a vao oa oirao piereva rutu vigei rutupa ora visii. Iu, uvare igei vo pitupituroaro-ia oisoa taraipata vo osa toupaiovora evoa visii tauvapaoro.

<sup>6</sup> Uva igei vo rugorugooroaro sirova utuoro orekerovu oisoa purapata Turaro vo rugorugooroaro torevokovira. Uva Pauto vo rearo-ia pitutavoiva, oearovu visii vuri piepaivora. Ari ita, oisoa rorupata rutu vo reoro-ia varao oara vira piereva Tugoropato Uraurato visiipa rorua tapo. <sup>7</sup> Uva oisi-a eisi osa ragavira va-ia ora visii-ia ovoovoa puratava voeaopa oirao pie vovou irara, oisore ra oisi va kekepaoro goruvira oirao pie vovou purapaive va sirova utupaoro, voeareo oearea Masedonia Provinsarei-ia toupaveira ora Grik. <sup>8</sup> Aue vituaro iava uvare Turaro vo siposipoaro-a oa oiso rutu ora sikataepa osa toiva gurukoaro oa ora sikataepa voraro ruture. Ari ita, avaeapa voare vo Masedonia-ia ora evoa Grik-ia. Oa iava voava uvarovu ruture puteva, oiso ra oearovu voraro va iava uvuoro visii varaaro oirao pie vovouro-ia taraipaave rutu. Oa vituaro iava viapau oiso uvuipaiei ra oearoipa ita siposipoio. <sup>9b</sup> Evoea oea oisoa visii iava igei siposipopaive, vo osa visii tapo oisoa toupaiio. Aue iava uvare vearovira rutu oisoa igei tokipata. Ora varao iava tapo osa ora visii vo kovoroaro varao tokarasipa kovoro tavariotava oiraopatoa rutu iare Pauto ro irapa kovopataveira. <sup>10c</sup> Ora aue tapo osa rera oviitoaarore tuepataveira ro ira vuvuiua iava vararoverea. Eera ro Oviito Jisas ira vorevira tore piereva kopii tapi iava. Ro raga ita ira vigei virivaripareveira osa iava viapau Pauto vo kasipuario vigei-ia pou piroverea. Oa-a eva voea vuri vovou irara-ia pou piroverea.

### Pol Vo Kovoaro Iava Vao Oa Purareva Tesalonaika-ia

**2** <sup>1</sup> Oire va vao-ia araoko irara oaio, oa-ia tarai irapata oiso-ia, Viapau oiso akukuvira raga visii iare tavete ragaiova. Viapau. Uvare igei vo kovoaro kueera visii-ia. <sup>2d</sup> Uva vao-ia tapo oiso ragavira taraipata rutu osa Filipai-ia oisoa toupaiio, uva oisoa oearovu igei vuri piepaive rutu igei tovipaoro. Uva va-a eva oa iava Tesalonaika iare topa uviroiepa. Uva evoa ita oearovu oisoa igeire ita kaureopaave. Ari ita, Pautoa raga ira oisoa igei vo vovouroaro goru piepareve rutu, oiso ra visiipa Vearo Siposipo iava tavitavipaio. <sup>3</sup> Uva torevokovira rutu va iava visiipa siposipoiova, ra va-ia viapau visii iava irai piro pieio. Viapau rutu. Ora aue tapo viapau ora igei raga-ia rugoopaoro vo siposipo puraiova. <sup>4</sup> Ari reoreopaioveira vao sirova utupaoro Pauto vo ruipaaro, uvare oisire igei

<sup>a</sup> 1:5 2 Te 2:14; Kl 2:2    <sup>b</sup> 1:9 1 Ko 12:2; Ga 4:8    <sup>c</sup> 1:10 2 Pi 3:12; Ap 2:24; Ro 5:9

<sup>d</sup> 2:2 Ap 17:1-4

oisi uvuireva. Oa iava oiso puraroepa igeire, “Uvuiatai ra Vearo Siposipo kaeta va iava siposiposa.” Uva viapau oiso vaore oisoa Vearo Siposipo kosi piepaio, oiso ra oirara igei-ia rorupaive. Viapau. Vaore-a oiso ra Pauto igeire oiso puraroverea, “Vearovira rutu,” vo rara oisi igei vo vovouroaro eveireve. <sup>5</sup>e Oire uva oisi ragavira taraipataveira osa oisoa visii tapo toupau. Uva vo tou-ia viapau oisoa visii agoagoto ragapaoro toupau. Ora oiso tapo igei-ia taraipata, Viapau oiso orekerovu riiriipa vovou vai oisoa vataupaio. Viapau rutu. Pauto vearovira rutu ragai vo reoaro-ia taraiparoi osa oiso puraparai oiraopavira. <sup>6</sup>Ari ita, viapau oisore vo kovo puraiova ra igei vaisiaro raga rei piepata visii ora oearovu. Viapau rutu. Oiraopavira, uvare igei-a Krais-pa kovopa iraraaro voeao igoa arureva igei sipooro. Eisi osa iava uvuiapai ra oiso visii tavipaio, Igei vaisiaro rei piepata. Ari ita, osa viapau oisiei eisi. <sup>7</sup>Ari vao raga kave vovou rutu oa raga oisoa purapaio visii tapo tupaoro. Oiso rutu osa aakova oisoa kakaeto piepave vo osa vo kakae tokipave. <sup>8</sup>Oa iava visii kavikopaoro oisoa rorupaio Pauto vo reoaro iava visiipa siposipopaoro. Ora vao tapo osa oisoa oiso rutu vovoupaio ra ora igei iava sopaura oaio rutu vatepaio visiipa, uvare oisoa visii kaviko iraopaio rutu.

<sup>9</sup>f Oire uva apeisi-a araoko irara oaio? E igei vo kovoarore rugoopataveira vao-ia osa kovoiova visii-ia? Ari ita, uva goruvira rutu oisoa moni oupasa kovopaio vo ravireoura-ia ora vokiara tapo. Osa iava viapau oisoa igeipa orekerovu avu vai voripata, vo osa visii tapo oisoa tupaoro visiipa siposipopaio va iava vao Vearo Siposipo Pauto vaoro.

<sup>10</sup>Ari ita, igei vo pitupituroaro oisoa eveipata visii rutu ora Pauto vo osa oisoa rerapa goruvira kovopaio, ora vuri rugorugooro pura asavira. Osa iava viapau irai uvuiaroi ra oreoi purapareve igei vaisipaoro vo osa visii tapo toupau visii vao visiigoa Krais oirao piepataveira. <sup>11</sup>Oire oisi-a eisi osa ragavira va-ia tarai iraopata oiso-ia osa katakatavira rutu oisoa visii kavikopaio oiso rutu osa aite irara roopavira kakae vurero oaive kavikopaiveira. <sup>12</sup>g Uva oisoa visii iava sopaura goru piepaio. Ora tapo visii sopaoro oisoa varaata piepaio. Ora oisoa topatopa piepavira visii tavitavipaio, oisore ra vo touo purapata oa-ia uvuiaroi Pauto visii-ia rorupareve. Vao vituaro iava uvare visii roporeva oiso, Visiigoa koatataverea vore rera vo Saraaro-ia vao oa-ia rera vo kerariaro-ia rera tapo toupataverea.

### **Voae Rutu Goruvira Oirao Pie Vovou Purapaoro Sirao Vo Vavataaro Oisoa Kaepave**

<sup>13</sup>Oire uva oavu tapo-a vao-ia oiso osa visii iavirava Pautoa-ia vuurapa vaisi purapaioveira vo vokiara rutu-ia. Aue iava uvare visiipa Pauto vo

---

<sup>e</sup> 2:5 2 Ko 2:14-17   <sup>f</sup> 2:9 Ap 20:34; 2 Te 3:8   <sup>g</sup> 2:12 Ef 4:1; 1 Pi 5:10

reoro kaeiova. Oa iava va uvuoro ora visii sopaura oavisii-ia vo reo oriru ovoitava rutu. Uva oisoa viapau oiso rugorugoopata, Oiratoa raga vo reoro vao-ia. Osa viapau. Ari oiso rugoo ovoitaepa, Pautoa rutu vo reoro vao-ia, oreoa visii sopaaro-ia kovopaiveira visii eva oirao pie vovou irara. <sup>14<sup>h</sup></sup> Araoko irara oaio, uva visii vuria outavora oearovu-ia ora visii raga iava voearo vova ora visii raga vo taereroaro-ia. Uva visii lotupa irara oiso rutu toupatavoi osa voeao oea Judia Distrik-ia oisoa toupave Jisas vaisiarova. Uva va-a eva oa-ia vuria ouiva rera vaisiaro iavirava voeao-ia Jiu. <sup>15<sup>i</sup></sup> Uvare voea ita evoea Jiu oea Jisas upoiva rera kopii pieoro ora oevu profet irara. Ari ita, igei tapo oisoa vuri piepaive rutu vo osa oisoa igei sigupaive. Oiraopavira rutu, uvare ora voeare Pauto kasipu piepaiveira rutu. Ora aue tapo osa oearovure oisi eisi oisoa kasipupaave. <sup>16<sup>j</sup></sup> Igeire oisoa korukoru ragapaave oiso, Teapi ratau tou irarapa siposipopaio vo reo iava vao Pauto vo reoro. Oiso rugooparo, Teapi vo reo sirova utupaera, oiso rutu pieive Pauto voearo. Oa vao vituaro iava kap agasiopa rutu varao iava vuri vovouro voea varaaro. Uva va vao osa agasioiva, oira vurapaoro rirovira rutu kasipu iraparoveira Pauto, oisore ra oirapa voea opesi pie ovoireverea.

### Pol Oiso Ruipaparoepa Rutu Ra Vorerivira Ita Voea Kekereve

<sup>17<sup>k</sup></sup> Araoko irara oaio, voviri visii arova avaiepa. Uva varaura raga ita, ovusa rugorugooara tovira rutu igei iava visiire rugoopapeira. Uva va vao osa visiire rugooparo raiva taraa ragaparaveira oiso ruipaparo ra vorevira visii puaaro ita kekea. <sup>18</sup> Rirovira rutu ruipa irao ragapaioveira oiso ra vorevira visii iare kareio visii kekesa. Vo osa viapau. Uva ragai vorevira karesa akeake raga irapaaveira, vo ovusa Seten raga vorevira ragaire korukoruparo. <sup>19<sup>l</sup></sup> Ari ita, utupaua vigei reraaro Turaro Jisas vorevira voreroverea. Ra va iava rera puaaro-ia vigei rutu torevio vo vuuta-ia eva. Ra eake vai ouio igei? Ora eake vai iava vearo vovouio? Ora eake vai-ia rorua vai ouio? Ora aa vao oa-ia ora igei iava vaisiara rei pieioverea? Ari visii iavirava raga. <sup>20<sup>m</sup></sup> Uvare oiso rutu toupataverea, Igei vaaro keraria ora igei vaaro rorua.

### Pol Timoti Arureva Voea Iava Sopaura Goru Piesa

**3** <sup>1-3<sup>n</sup></sup> Viapau rutu uvuipaiei oiso ra visii iare urioio evoa, uvare viapau raivaa vai igeipa. Uva va-a vao oa iava rirovira rutu rugorugooaraerao vo tupaoro Atens urui-ia, oiso ra visii iare Timoti arua, ra visii iare urioro vo osa ragaipe vo raga. Ro Timoti vigei araokotoaaro ira Pauto vo kovoaro purapareveira vegei tapo Vearo

<sup>h</sup> 2:14 Ap 17:5; 2 Te 1:4    <sup>i</sup> 2:15 Mt 23:34-36    <sup>j</sup> 2:16 Mt 23:32-33    <sup>k</sup> 2:17 1 Ko 5:3; 1 Te 3:10    <sup>l</sup> 2:19 2 Ti 4:6-8; 1 Te 3:13    <sup>m</sup> 2:20 2 Ko 1:14    <sup>n</sup> 3:1 Ap 17:15

Siposipo siposipopaoro oearovupa Krai vaaro iava. Uva visii iare rera sipoavoi visii vo vovouroaro oirao pie vovouro goru piepasa rutu. Teapi oearovu visii varaaro oirao pie vovouro iava visii kosi piepaive visiire kasipupaoro, ra va iava vo vovouro oavisii kavupata. Uva taraipatai va-ia vao osa Pauto voeapa vasepareveira, auere ra vigei-ia vuriara purapaive voeao vuri irara. <sup>4</sup> Ari ita, vo osa oisoa visii tapo tou rovopaio uva voa visii taviiova oiso, Utupa visivi vuria oupere rara voeao ruvara-ia vuri irara. Oire uva taraipatai uvare oisi rutu eisi karekeepa. <sup>5</sup> Uva visii-ia rirovira rugorugooapaoro Timoti aruava visii iare, uvare viapau rutu uvuipaiei ra visii varaaro-ia taraipaio oirao pie vovouro oavisii vo raga toupapaoro. Uva rirovira rutu oiso rugorugooapaoveira, Seten vai pasi visii-ia kokaraproveira, oiso ra oirao pie vovouro oavisii kavupata. Oire ra oisi iava igei vo kovoaro akukupavira rutu visii-ia tou ragapaive.

### Pol Rorupareva Timoti Vo siposipoaro-ia

<sup>6</sup> Oire uva va vao osa Timoti visii ruvara iava vorevira kareroerao visii iava ragai tavitavisa. Uva vearo reo visii iava kaeoro kareroerao goru oirao pie rutu iava visii vaaro vo Krai vaisiara sovara-ia. Ora vao tapo iava osa oearovupa siraopataveira. Ora vao tapo iava osa visii iava ragaipa tavitavisa kareroerao, uvare vearo vovou rutu purapataveira igei-ia. Eva oa vituaro iava igeipa oiso ruipapataveira rutu ra igei keketa. Osa igei tapo ita oisi ruipapaio oiso ra visii kekeio. <sup>7-8</sup> Uva oisi-a eisi osa iava igei iava vovouisiro varaatavira toupaveira, vo osa vuri vovou vo siraoaro sovara-ia tupaio oearovu vovouroaro. Iu araoko irara oai, visii varaaro iava oirao pie vovouro uvupaoro tootopaiei rutu, vo osa tavosivira rutu Turaro tapo toupataveira. <sup>9</sup> Eva-a oa iava uvuipaiei ra vearo vaisi Pautoa-ia purapaio visii iavirava. Ari ita, rorupaiovoi rutu vo Pauto osireiara-ia, uvare visii vaaro-ia taraipaiei vearo rutu toua. Oa iava Pautoa-ia vuurapa vaisi purapaiovoi rutu visii iavirava. <sup>10</sup> Vo ravireopa vokiara ora vo vokiara uvaroa Pauto arepaioveira rutu oiso ruipapaoro ra visii iava puara kekepaio. Ari ita, vosa visii varaaro oirao pie vovouro potepaive, oa iava uvuipaiei igei visiipa vara riro piepaio ita.

### Pol Variriroepa Pauto Iare

<sup>11</sup> Igei-a vao oiso ruipapaiei ra vigei Aitearo Pauto vaiterei ora vigei reraaro Turaro Jisas igeipa raiva vai purasi. Ra oai iava evoare torevokovira urioio visii iare. <sup>12</sup> Ora oiso tapo osa rirovira rutu oiso ruipapaiei ra visii varaaro siraopa vovouro riro piepareve rutu Turaro oavi. Oire ra vo vovouro iava oearovivupa siraopata ora visii iava voeoro ora oearovu rutu. Eisi osa iava uvuipai ra vaeavira rutu touve igei vo

° 3:5 1 Ko 10:12-13    P 3:7 Ef 6:11-17    ° 3:9 1 Te 1:2    ° 3:12 1 Te 4:1, 10

vovouarova siraopa vovou. <sup>13s</sup> Uva oisi-a eisi osa uvuipai ra toupavora, sopaura oavisii uvuipa ra va iava visii iava vo vovouro goru piepareve rutu Turaro. Oa iava uvuipatai ra torevokovira raga rera osireiario-ia kareketaverea Pauto Aite vo vokio-ia oa-ia vorevira kareroverea oirara rutu tapo rera voeaaro vigei reraaro Turaro Jisas.

**Vo Toupai Toua Iava Vao Oa Iava Uvuipa Pauto Vigei-ia Rorupareve**

**4** <sup>1</sup>Oire oavu-a vao araoko irara oaiio tavipaiovoi. Igei ruvara-ia vo taraio outavora vao iava vearo tou oa-ia Pauto roru pietavora. Uva va-a vao oa iava goru pievira ita Turaro Jisas vaisiario-ia visii oiso tavitavipaiovoi, Uvuipatai ra eva-ia pute pievira oaravu rutu ita purapata vearopa pitupituro.

<sup>2</sup>Ari ita, oreoa-ia vao tarai reo taraipatai oa visiipa vateiovora ro vaisiario-ia vigei reraaro Turaro Jisas. <sup>3t</sup> Uvare Pauto oisi eisi ruipaparoveira oiso ra oisi vara purapata oiso-ia, vo osa sopaura oavisii visii iava torevokovira raga toupave, vo rara viapau otopa pitupiturore rugoopata vara purapasa. <sup>4u</sup> Ari visii uvuipatai ra katakataipavira ora oupa pitupitu raga purapata. Oa iava uvuipatai torevokovira raga riakora oavisii oupata, oa-ia viapau vuria vai. <sup>5v</sup> Vosa oisi piepaoro eisi, viapau oiso vo vovouo otopa purapata. Oa oiso toupaveira voeao vaaro oea viapau Pautoa-ia taraipaave. <sup>6</sup>Ora viapau oiso irai uvuiparoi ra vuria vai purareve ora irai araokotoa vaiario-ia irai keakeapaoro, oiso ra rera putereve rera-ia. Oa-a vao oa iava voari tuariri visii taviiova. Vo uva varare evara ravaavira visii vosiiova oiso visii tavioro, Turaro voeao vorireverea oea oiso vara vuriara purapaiveira. <sup>7w</sup> Uvare viapau oiso Pauto vare eva otopa pitupitu vigei roporeva. Viapau. Ari vaore-a oiso ra vearovira rutu roroiiovira toupape. <sup>8</sup>Uva oiso toupai vo osa ro ira vo reore vao-ia isivaparo. Uvare eake-a? Viapau oiso oirara ragare oisi isivaparoveira eisi. Ari Pautoa-re ro ira visiipa Tugoropato Uraurato vatepareveira.

<sup>9</sup>Ari ita, oiso taraipatai viapau oiso uvuiparai ra vorerivira visii ita roroiio piea vaore, ra ora visii araoko iraraaropa siraopata. Uva rera visii tarai pie ragaparevora Pauto, oiso ra oearovivupa ora visii iava voea kavikopata. <sup>10</sup>Ari ita, oiso osa oearovivupa piepataveira ita vigei araoko iraraaro voearo riro oirao pie vovou irara, oearoa voraro toupaveira Masedonia Provins-ia. Uva oiso goruvira rutu visii tavipaavoi, Uvuipatai ra evo vovou-ia pute pievira rutu oisi piepata eisi. <sup>11</sup>Oire uva ora eaka pie iraopata. Opeita voraro vokapata oearovu vo rugorugooroaro torevoko ragapasa ora visii vo ruiparoaro raga-ia. Ari uvuipatai ra moni oupata ora

<sup>s</sup> 3:13 1 Ko 1:8; 1 Te 2:19, 4:17    <sup>t</sup> 4:3 1 Ko 6:18; Kl 3:5    <sup>u</sup> 4:4 1 Ko 7:2; 1 Pi 3:7

<sup>v</sup> 4:5 1 Ko 6:14-20    <sup>w</sup> 4:7 Hi 12:14; Lev 11:44

visii vo kovoroaro-ia varao oara purapataveira ora visii vavaearo iava. Oiso osa voari rovoa-ia tuaririvi visii tavi rovoiovora. <sup>12</sup> Oa iava uvuiipai oearovu oirao pie vovou asa irara oisi iavirava visii kekepaoro visiipa avivikepaave. Ora aue tapo ra viapau potepata auepa veaopara varao oara arepataveira oearovu ruvara-ia.

### Turaro Vigei Rutu Ousa Vorevira Voreroverea

<sup>13</sup> Araoko irara oaio, igei oiso ruipapaiei ra voeao-ia tarai iraopata rutu kopii irara vaopa, teapi rirovira rutu visii iava sopaura siraopape rutu voeapa oiso rutu osa voearo oearoa viapau Pauto oirao piepaoro gaupaiveira. <sup>14</sup> Oiraopavira rutu oiso osa vigei va vao oirao piepapeira oiso-ia, Jisas kopiioepa, oa iava vorevira va iava ora poreteroepa toreoro. Oa-a eva vituaro iava oiso ragavira rera oirao piepaioveira. Osa ragavira iava Pauto voea rutu voeao kare piereverea oea kopiipaaveira Jisas oirao piepaoro. Oea rera tapo kareaverea Jisas.

<sup>15</sup> Oire uva oiso ruipapaiei ra visiipa vao iava taviio oa iava Jisas tavioepa rera vo siposipoaro-ia vo vokio iava oa-ia vorevira voreroverea vigei rutu ousa. Uva vigei vao vigoa tootoopaviei viapau oiso voeapa iravioverea oea kopiipaaveira. <sup>16</sup> Viapau. Asi Turaro raga-a ira vuvuiua iava oiso keerapaoro vararo. Ora rovopatoa rutu reito enselto ira kaku pie rovoreverea vo osa Turaro vaaro utave guruko pura piro. Ogurukoa isivaaro iava voeao oea Kraiss oirao piepaoro kopiipaaveira tore rovoaverea. <sup>17</sup> Uva evoea isivaaro iava vigei rutu vao vigoa tootoovira toupai vo vokio-ia voeava aivaroperea rukuta sovara-ia. Ra va iava vigei rutu Turaro iare pou virovio vo vuvuiua rutu ivara-ia. Uva voa-a evoa Turaro tapo toupaperea vokiara rutu-ia. <sup>18</sup> Oreoa vao-ia oa iava uvuiipatai ra oearovivu tavitavipata. Ra va uvupaoro ora voea iava vovouisiro oaive varaata piepaive.

### Ora Vatatopo Iraopata Vo Vuutaopa Oa-ia Turaro Vorevira Voreroverea

**5** <sup>1</sup> Araoko irara oaa, viapau oavu reoa rigatopaavoi visiipa, oiso ra va-ia visii siposipopaa evo vuutaro iava oara-ia orekerovu karekeperea vo utupaua rutu. Ari ita, viapau ruruvutu rugorugoo irara-a visii. <sup>2</sup> Viapau. Ari taraipataveira oiso, Vo voki-a vao oa vatauvira pou piroverea oiso rutu osa kavirupato vo pitupituaro. Uva viapau irai evo vokia-ia taraiparo ovokia-ia voreroverea Turaro. <sup>3</sup> Ovuuta-a eva oa-ia oearovu oiso purapaaverea, “Viapau oiso oavu avu vaiei. Ari orekerovu rutu torevokovira raga toupai.” Vo osa vo vuuta-a eva oa-ia riroa rutu siraoa vo tavakaaro karekeperea voea rutu-ia. Oiso rutu osa riakova

<sup>x</sup> 4:13 Jo 11:11-27    <sup>y</sup> 4:14 1 Ko 15:13, 23    <sup>z</sup> 4:15 Ap 1:10-11    <sup>a</sup> 4:16 Mt 24:31

<sup>b</sup> 4:17 1 Ko 15:52    <sup>c</sup> 5:2 1 Ko 1:8; 2 Pi 3:10    <sup>d</sup> 5:3 Hos 13:13

oisoa upia oupaeve vo osa kakaeto kavausa auepao. Viapau rutu oiso uvuiaverea vo tavaka eva vatavatasa, uvare Pauto vo Saraaro iava opesi ovoiai. <sup>4e</sup> Ari ita, araoko irara oaa, viapau oiso visii vo rugorugooroaro visii iava rupavira toupaveira, ra oisi iava visii sita pieoro vo voki eva pou piro oiso rutu osa kavirupato. <sup>5</sup> Ari visii rutu aviavi rugoovira toupatavoi. Uva vigei rutu-a vao oirara vo vokio iava ravireopa voki. Viapau oiso rupa voki iava vigei-a. <sup>6</sup> Teapi uusipata oiso osa oearovu. Viapau. Ari vigei uvuiipaviei ra ora airereipavio varao tokipaoro rutu ora vigei iava varauraro oavi vo ruiparoaro. <sup>7</sup> Oiraopavira rutu, uvare rupa vokia oa-ia uusipaaveira oirara osa oearovu vo rupa-ia spakpaaveira kokoropaoro. <sup>8f</sup> Ari vigei-a aviavi voki iava voea oirara. Oa vituaro iava uvuiipaviei ra roroio rugorugoo rutu-ia toupape vao oearovupa siraopa rugoo ora oirao piepa rugoo. Oa iava uvuiipaviei ra ora utopatoa-ia oirao piepato kuvuvio kuvupato vuriara asavira. Ora oa iava uvuiipaviei ra ora vigei iava kukueara kukuvaie vo pitupituo-ia oa-ia Pautoa-re tuepavioveira vo vokiore, oa-ia vigei rutu ourevere vorevira ora rerapa. <sup>9</sup> Viapau oiso Pauto vaore oiso vigei roporeva, ra vigeire kasipuro vigeipa upia vateoro. Viapau. Asi vigei reraaro Turaro Jisas Krai kopiiroepa. Oa iava vigei varaaro vuri vovouro voriaro oureva rera raga. <sup>10s</sup> Eva-a oa vituaro iava uvuiipaviei ra rera tapo tootoovio vo utupaua. Eagara vosa apeisi tootoovira toupape, eke kopiiivira toupape ovusa urioro vorevira vigeire. <sup>11</sup> Uva oisi-a eisi osa ragavira uvuiipatai ra oearovivu ora visii iava sopaaro varaata piepata voea taupapaoro oiso osa ora visii raga ora piepataveira.

### Vo Reoreo Iava Oa-ia Vo Pasio Opesi Piereva

<sup>12h</sup> Oire uva visii goruvira akepaavoi, oisore ra voeao-ia rei vaisi purapata oea visiipa reipaaveira. Uvare Turaro voea roporevora, auere ra visii taupapaive visiipa tarai reoro vatepaoro. <sup>13</sup> Uva uvuiipatai ra voeavipa reipa irara avivikevira rutu toupata voeapa siraopaoro. Aue iava uvare voea-a evoea oea Turaro vaisiaro sovara-ia kovopaoro toupavoi. Oire ra ora visii ragava tapo gavaure vovou rutu purapata.

<sup>14i</sup> Araoko irara oaio, goruvira rutu visii tavipaiovoi, oiso ra voearovio pokapoka vovou irara vosipata rutu. Ora voeao tapo vovouaro goru piepata oea uririavi purapaaveira. Ora oiso ra voearovio tapo taupapata oearoa viapau oiso goruvira torepaveira. Ra oisi eisi piepaoro kave vovou rutu purapata vo oearovu rutuva.

<sup>15j</sup> Vosa irai visii iava irai vuri piereve, viapau oiso uvuiipatai ra rera varirivira ita vuri pieta. Viapau rutu. Ari goruvira rutu vaore rugoo

<sup>e</sup> 5:4 Ro 11:14; 1 Jo 2:8    <sup>f</sup> 5:8 Ais 59:16-21    <sup>s</sup> 5:10 2 Ko 5:15    <sup>h</sup> 5:12 1 Ti 5:17; Hi 13:17  
<sup>i</sup> 5:14 2 Te 3:11; Ro 14:1    <sup>j</sup> 5:15 Ro 12:17; 1 Pi 3:9



iraopata, ra ora visiiva vearo vovou raga purapata oearovu rutu tapo oirara.

<sup>16</sup>Vokiara rutu-ia roruvira raga toupata. <sup>17</sup>Vokiara rutu variripata reasi asavira. <sup>18</sup>Vosa eake karekepe visii-ia, uva uvuipatai ra va-ia vearo vaisi purapata Pautoa-ia. Vao vituaro iava osa Pauto oisi ruipaparoveira eisi vo osa Krai Jisas vaisiario-ia oisi piepata.

<sup>19</sup>Ra opeita Tugoropato Uraurato vo goruaro sisipata oiso osa eto kasiro sisipataveira vo kasiro roko piepaoro. <sup>20</sup>Ra opeita voea vo reoroaro uvu arapa reasipata oea oiso toupaveira, Pauto gisipoaro. <sup>21</sup>Orekerovu rutu vearovira rovirieipata vara iava vearopara raga roporopopaoro vara-ia pitupasa. <sup>22</sup>Ra oisi piepaoro eisi vearovira varao rutupa vatavata iraopata vuri pitupituro.

<sup>23</sup>Oiraopavira ita, uvare Pauto-a ro-ia gavaure vovou vituaro rutu. Ira uvuipa ra visii airereipareve, oiso ra roroio vovou raga-ia toupatavere. Oa iava urauraara oavisii ora vovouisiro oavisii ora varauraro oavisii oara rutu uvuipai ra vuri asavira rutu toupave vo vokiore tuepaoro oa-ia vigei Turaroaro Jisas Krai vorevira voreroverea. <sup>24</sup><sup>k</sup> Uva Pauto visiire keeraroepa, ra oisi pierave visii-ia eisi osa iava uvuipa, ra viapau visii kavureve.

<sup>25</sup>Araoko irara oaa, variri iraopata igeivipa.

<sup>26</sup>Ora sekanpata oearovivu tapo vo Jisas vaisiario sovara-ia evoea vigei araoko iraraaro.

<sup>27</sup>Oire uva ragai-a vao goruvira rutu oiso visii tavipaavoi Turaro Jisas vaisiario sovara-ia, oa iava uvui iraopatai ra vo pasio vieita voea rutupa oirao pie vovou irara evoea araoko irara oavi.

<sup>28</sup>Igei variripaiei, oiso ra Turaro Jisas Krai visiipa vereopa vovou vatereve.

Eisivi raga osa vo rigato purapaavoi visiipa.

Ragai-a vao, Pol.

---

<sup>k</sup> 5:24 Fl 1:6